

Uvestgieu tira la curta – Losanna dat raschun al Corpus Catholicum

Sin il recurs dal vicari general n'entra il tribunal betg

DA CLAUDIA CADRUVI / ANR

■ **L'uestgieu da Cuira e ses vicari general Martin Grichting han per tut pretsch vulì impedir che l'organisaziun Adebar survegnia daners dal Corpus Catholicum. Els han protestà atras tuttas instanzas. Ier ha il Tribunal federal publitgà ses verdict.** Ils derschaders da Losanna refusan il recurs da la diocesa da Cuira. La contribuziun da 15 000 francs dal 2012 per Adebar na violeschia betg la libertad da cardientscha, scriva il Tribunal federal en sia comunicaziun. Adebar porscha cussegliaziuns per la planisaziun da famiglia, davart sexualitad e gravidanza. L'uestgieu e Grichting disturbì che Adebar infurmescha era davart l'interrupziun da la gravidanza e l'uschenumnada pirla per suenter.

Grichting n'è betg legitimà

Il Corpus Catholicum – pia la baselgia catolica chantunala dal Grischun – è finanzia cun daners da taglia che mintga catolic grischun ha da pagar. Il 2012 approvescha la radunanza annuala dal Corpus Catholicum ses budget. Quel cuntegna, sco gia ils onns avant, la summa da 15 000 francs per Adebar. La contribuziun vegn concedida sut la cundiziun che l'uniun n'impundia ils daners betg per cussegliaziuns davart interrumpere la gravidanza u per la pirla per suenter. La proposta dal vicari general da betg pli sustegnair quest'uniun refusa la radunanza.

Encunter questa decisiun protestan l'uestgieu da Cuira ed er il vicari general Grichting senza success: l'emprim tar l'istanza da recurs da la baselgia catolica e suenter avant la Dretgira administrativa chantunala. L'uestgieu e Grichting

tiran vinavant il cas a Losanna. Ils derschaders entran dentant sulet sin il recurs da l'uestgieu e betg sin quel da Grichting. Lez fa valair che la decisiun d'expensas na sa cumportia betg cun si'atgna persvasiun persunala religiosa. Per ils derschaders na basta quai betg per legitimar ses dretg da recurs. Or dals arguments da l'uestgieu legian ils derschaders dentant ina cuntraversa da valor ideala cun l'organisaziun Adebar ch'ademlescha la legitimaziun da recurrer.

N'impedescha nagin en sia persvasiun

Era sch' il tribunal entra sin la protesta da l'uestgieu refusan ils derschaders en chaussa tuttina il recurs. Ins sappia bain partir da quella ch'ina part da las activitads dad Adebar sajan da refuser ord vista roman-catolica. Ma or da gliez na sa resultia betg il dretg da pretendere che las contribuziuns stoppian vegnir scumandadas. Cuzunt era perquai ch'ils daners per la contribuziun derivian la finala da la baselgia chantunala e betg or da meds da la baselgia roman-catolica, scrivian ils derschaders a Losanna. La contribuziun ad Adebar na violeschia perquai betg la libertad da cardientscha da la baselgia roman-catolica. Plinavant na vegnia il dretg da la baselgia chantunala era betg applitgà a moda arbitraria. La baselgia roman-catolica sco er ils cristifidaivels na vegnian entras la contribuziun finanziaria per Adebar betg impedids da viver lur persvasiun religiosa.

Damonda da principi n'è betg sclerida Gnanc tractà ha il Tribunal federal la dumonda schebain contribuziuns finanzielas dal Corpus Catholicum ston, sut



L'uestgieu da Cuira ha cumbattì dapi il 2012 il sustegn finanziel da l'organisaziun Adebar.

KEYSTONE

l'aspect da la costituziun da la baselgia catolica grischuna, sa drizzar en general tenor ils principis da la baselgia roman-catolica. Questa dumonda han ils derschaders aposta laschè avert damai che la

contribuziun ad Adebar è gea stada liada a la cundiziun ch'ils daners na vegnian betg impundids per cussegliaziuns d'interrumpere la gravidanza u sumegliants temas. En quest senn èn las miras da la

baselgia roman-catolica tuttavìa ademplidas.

Sentenzia 2C_955/2016, 2C_190/2018 dals 17 da december 2018, publitgada ils 30 da schaner 2019.